

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**ZAKON
O IZMJENAMA I DOPUNAMA
ZAKONA O PLAĆAMA I NAKNADAMA POLICIJSKIH SLUŽBENIKA
FEDERACIJE BOSNE I HERCEGOVINE**

Sarajevo, august 2017. godine

**ZAKON
O IZMJENAMA I DOPUNAMA
ZAKONA O PLAĆAMA I NAKNADAMA POLICIJSKIH SLUŽBENIKA
FEDERACIJE BOSNE I HERCEGOVINE**

Član 1.

U Zakonu o plaćama i naknadama policijskih službenika Federacije Bosne i Hercegovine („Službene novine Federacije BiH“, broj 45/10) u članu 2. tačka 6), broj “7” zamjenjuje se brojem “6”.

U tački 7) iza broja “27/05” riječ “i” zamjenjuje se zarezom, a iza broja “70/08” dodaju se riječi: “i broj 44/11”.

Iza tačke 7) dodaju se nove tač. 8) i 9) koje glase:

“8) **“smrt policijskog službenika”** u smislu ovog zakona smatra se prirodna smrt policijskog službenika;

9) **“gubitak života”** u smislu ovog zakona smatra se kada policijski službenik izgubi život u obavljanju ili povodom obavljanja službe ili zadatka.”.

Član 2.

U članu 3. stav 1. u tekstu u zagradi, iza riječi “budžet” dodaje se riječ “Federacije”.

Stav 2. mijenja se i glasi:

“Vlada Federacije Bosne i Hercegovine (u daljem tekstu: Vlada Federacije) će radi nesmetanog funkcionisanja organa vlasti Federacije Bosne i Hercegovine (u daljnjem tekstu: Federacija) vršiti utvrđivanje i isplatu brutoplaća i naknada korisnicima prava koje tretira ovaj zakon, na osnovu utvrđene osnovice, samo do visine planiranih sredstava u budžetu Federacije za te namjene.”

Član 3.

Član 4. mijenja se i glasi:

“Član 4.

Pri određivanju iznosa plaće i naknada za policijske službenike poštivat će se načelo transparentnosti, što treba da osigura objavljivanje javnog konkursa ili oglasa za popunu slobodnih radnih mjesta policijskog službenika te da se obavezno objavljuje podatak o pripadajućoj osnovnoj netoplaći za oglašena radna mjesta.”.

Član 4.

Član 6. mijenja se i glasi:

“Član 6.

Osnovna plaća se utvrđuje množenjem osnovice za plaću iz člana 8. ovog zakona i boda za obračun plaće s uvrđenim koeficijentom platnog razreda i tako

utvrđeni iznos uvećava se za 0,5% za svaku punu godinu radnog staža policijskog službenika, a najviše do 20%.

Osnovna plaća ne može biti manja od 70% prosječne netoplaće isplaćene u Federaciji prema posljednjem objavljenom statističkom podatku.

U slučaju da množenjem utvrđene osnovice, boda za obračun plaće i pripadajućeg koeficijenta platnog razreda osnovna plaća iznosi manje od 70% prosječne plaće, policijskom službeniku će se isplatiti plaća u navedenom postotku.

Osnovna plaća obračunava se i iskazuje mjesečno za puno radno vrijeme, prema radnom mjestu i odgovarajućem platnom razredu.

Ukoliko policijski službenik radi sa nepunim radnim vremenom, u skladu sa posebnim zakonom ili drugim propisima, osnovna plaća odredit će se srazmjerno vremenu provedenom na radu.

Puno radno vrijeme zaposlenih je 40 sati sedmično.“

Član 5.

U članu 7. st. 1. i 3. brišu se.

Član 6.

Član 8. mijenja se i glasi:

“Član 8.

Osnovica za obračun plaće se utvrđuje zakonom o izvršavanju budžeta za svaku budžetsku godinu ili odlukom o privremenom finansiranju i primjenjuje se od 1. 1. za svaku narednu godinu.

Pored osnovice za obračun plaća, prilikom obračuna plaće će se koristiti i bod za obračun plaće koji se utvrđuje zakonom o izvršavanju budžeta za svaku budžetsku godinu ili odlukom o privremenom finansiranju i primjenjuje se od 1. 1. za svaku narednu godinu.

Utvrđivanje osnovice i boda vrši se u pregovorima sa reprezentativnim sindikatom, a prije usvajanja zakona, odnosno odluke iz stava 1. ovog člana. Ukoliko se ne postigne dogovor, Vlada Federacije će utvrditi osnovicu i bod, pri čemu visina osnovice ne može biti niža od prethodno dogovorene, odnosno važeće.

Prilikom utvrđivanja osnovice i boda za obračun plaće iz st. 1. i 2. ovog člana uzet će se u obzir projekcije budžeta za narednu godinu, kao i kretanja GDP i indeksa potrošačkih cijena, a prema podacima Federalnog zavoda za statistiku.

Isplate mjesečnih novčanih primanja izvršene u skladu s odredbama ovog zakona su definitivne i konačne.“

Član 7.

U članu 10. stav 1. iza riječi “staža“ stavlja se tačka, a preostali dio teksta briše se.

U stavu 2. iza riječi „staža“ stavlja se tačka, a preostali dio teksta briše se.

U stavu 4. riječi: "Policijske akademije" zamjenjuju se riječima: "Federalnog ministarstva".

Član 8.

U članu 11. stav 1. riječi: "Policijske akademije" zamjenjuju se riječima: "Federalnog ministarstva".

Član 9.

U članu 12. stav 1. mijenja se i glasi:

"Plaća policijskog službenika se isplaćuje za prethodni mjesec nakon obavljenog rada, u razdobljima isplate koja ne mogu biti dulja od 30 dana."

U stavu 3. riječ: "postavljen" zamjenjuje se riječju "raspoređen".

Član 10.

U članu 16. stav 1. u trećem redu riječ "osnovne" briše se.

Stav 2. mijenja se i glasi:

"Obračun naknade iz stava 1. ovog člana vrši se od osnovne plaće iz člana 6. ovog zakona uvećane za dodatak na plaću iz člana 10. ovog zakona bez dijela plaće po osnovu radnog staža."

Član 11.

U članu 17. stav 1. mijenja se i glasi:

"Policijski službenik koji je prema članu 64. Zakona o policijskim službenicima premješten na drugo radno mjesto koje je 60 km ili više udaljeno od njegovog trenutnog radnog mjesta ima pravo uz plaću i naknadu za odvojeni život od porodice i naknadu troškova smještaja u mjestu rada u iznosu i na način koji Vlada Federacije utvrdi za državne službenike i namještenike."

Član 12.

U članu 18. iza stava 2. dodaje se novi stav 3., koji glasi:

"Pravo na otpremninu ne pripada policijskom službeniku koji je proglašen viškom na osnovu konačne odluke nadležnog organa o utvrđivanju postojanja sigurnosne smetnje za pristup tajnim podacima određenog stepena tajnosti u skladu sa Zakonom o zaštiti tajnih podataka („Službeni glasnik BiH", br. 54/05 i 12/09)."

Član 13.

Član 19. mijenja se i glasi:

"Član 19.

Policijski službenik koji u obavljanju ili povodom obavljanja službe ili zadatka izgubi život, sahranit će se o trošku Uprave policije, odnosno Federalnog ministarstva u mjestu koje odredi njegova porodica.

Porodici koju je policijski službenik iz stava 1. ovog člana izdržavao pripada jednokratna finansijska pomoć u iznosu posljednje netoplaće koju je policijski službenik ostvario, uvećane šest puta.“

Član 14.

Iza člana 19. dodaje se novi član 19a., koji glasi:

“Član 19a.

U slučaju prirodne smrti policijskog službenika na radnom mjestu i van radnog mjesta i smrti člana uže porodice, porodici ili policijskom službeniku će se isplatiti jednokratna novčana pomoć u iznosu četiri prosječne netoplaće isplaćene u Federaciji, prema posljednjem objavljenom statističkom podatku.

Ukoliko u Upravi policije, odnosno Federalnom ministarstvu rade dva ili više članova porodice, troškovi sahrane iz stava 1. ovog člana isplaćuju se samo jednom zaposlenom članu porodice.“

Član 15.

U članu 23. stav 2. riječi: “raspoređeni u organizacionim jedinicama“ brišu se.

Član 16.

Iza člana 27. dodaje se novi član. 27a., koji glasi:

“Član 27a.

Pravo na smještaj i odvojeni život od porodice direktor policije i njegov zamjenik čije je mjesto prebivališta udaljeno više od 70 km od mjesta rada ostvaruju u skladu sa odredbom člana 27. ovog zakona”.

Član 17.

U članu 29. iza stava 2. dodaju se novi st. 3. i 4., koji glase:

“Rješenje iz stava 1. ovog člana, koje se odnosi na direktora policije i njegovog zamjenika, donosi federalni ministar.

Na rješenje koje donosi direktor policije, odnosno federalni ministar na osnovu ovog zakona policijski službenik može izjaviti žalbu Policijskom odboru u roku od 15 dana od dana prijema rješenja.“

Član 18.

Ovaj zakon stupa na snagu narednog dana od dana objavljivanja u „Službenim novinama Federacije BiH“.

O B R A Z L O Ž E N J E

I - USTAVNI OSNOV

Ustavni osnov za donošenje Zakona o izmjenama i dopunama Zakona o plaćama i naknadama policijskih službenika Federacije Bosne i Hercegovine sadržan je u odredbama člana IV.A.7.20.d Ustava Federacije Bosne i Hercegovine („Parlament Federacije nadležan je za donošenje Zakona o vršenju funkcija federalne vlasti“), a u vezi sa članom III.1.d) Ustava Federacije BiH, jer se ovim zakonom uređuju place i naknade policijskih službenika koji obavljaju poslove iz isključive nadležnosti Federacije Bosne i Hercegovine .

II - RAZLOZI ZA DONOŠENJE ZAKONA

Tokom primjene Zakona o plaćama i naknadama policijskih službenika Federacije Bosne i Hercegovine utvrđeno je da postoje određena pravna rješenja koja otežavaju njegovu primjenu u praksi. Također, došlo je do izmjena i dopuna određenih zakona na koje se poziva Zakon o plaćama i naknadama policijskih službenika Federacije Bosne i Hercegovine te ih je potrebno usaglasiti.

Donošenje Zakona o izmjenama Zakona o plaćama i naknadama u organima vlasti Federacije Bosne i Hercegovine (“Službene novine Federacije BiH”, broj 20/17) obavezuje da se i Zakon o plaćama i naknadama policijskih službenika Federacije BiH uskladi sa rješenjima utvrđenim u navedenom zakonu, jer je način utvrđivanja osnovice za obračun plaće i za policijske službenike i državne službenike na području Federacije BiH isti.

S obzirom na to da je došlo do promjene utvrđivanja osnovice za obračun plaće za državne službenike i namještenike u organima vlasti Federacije, potrebno je te promjene uskladiti i za policijske službenike, što se vrši ovim zakonom.

III - OBRAZLOŽENJE PRAVNIH RJEŠENJA

Rješenja utvrđena u ovom zakonu nastala su kao rezultat primjene važećeg zakona, primjedbi i sugestija iznesenih na raspravama u Parlamentu Federacije BiH, primjedbi i sugestija datih u postupku konsultacija koje su provedene u skladu s Uredbom o pravilima za učešće zainteresirane javnosti u postupku pripreme federalnih pravnih propisa i drugih akata („Službene novine Federacije BiH“, broj 51/12) te obaveznim usklađivanjem s odredbama Zakona koji već ova pitanja uređuju na drugi način, a koja se odnose na utvrđivanje osnovice i obračuna plaće.

Članovima: 1., 2., 3., 8., 12, 15. i 17. izvršeno je usklađivanje s izmjenama i dopunama Zakona o policijskim službenicima Federacije BiH koje su objavljene u “Službenim novinama Federacije BiH”, broj 44/11 te sa Zakonom o budžetu Federacije BiH i Zakonom o izvršenju budžeta Federacije BiH.

Članovima: 4., 5., 6., 7. i 10. izmijenjeni su čl. 6. 8. i član 16. stav 2 Zakona, te su brisani član 7. st. 1. i 3 i određeni tekst u članu 10. st. 1 i 2. Ovim izmjenama i brisanjem u navedenim članovima izvršeno je usklađivanje s odredbama Zakona o izmjenama Zakona o plaćama i naknadama u organima vlasti Federacije Bosne i Hercegovine ("Službene novine Federacije BiH", broj 20/17).

Članom 9. je izvršeno usklađivanje sa novi Zakon o radu i Zakon o izvršenju budžeta FBiH.

Članovima: 11., 13., 14. i 16. utvrđeni su uvjeti i postupak ostvarivanja prava na naknadu za odvojeni život od porodice i naknadu troškova smještaja i gubitka života na zadatku policijskog službenika i u slučaju prirodne smrti, te pravo na smještaj i odvojeni život od porodice direktora Federalne uprave policije i njegovog zamjenika.

Članom 18. određeno je kada Zakon stupa na snagu, što se vezuje za naredni dan od dana njegovog objavljivanja u "Službenim novinama Federacije BiH".

IV - USKLAĐENOST PROPISA S EVROPSKIM ZAKONODAVSTVOM

Federalno ministarstvo unutrašnjih poslova nije moglo utvrditi da postoji primarni i sekundarni izvor prava Evropske unije koji regulišu na poseban način pitanja koja su regulisana navedenim zakonom.

V - PROVEDBENI MEHANIZMI I NAČIN OSIGURANJA POŠTIVANJA PROPISA

Provođenje Zakona o izmjenama i dopunama Zakona o plaćama i naknadama policijskim službenicima Federacije Bosne i Hercegovine je u nadležnosti Federalne uprave policije, jer se predmetni zakon odnosi na policijske službenike koji su raspoređeni u Federalnoj upravi policije.

Osiguranje poštivanja predmetnog zakona osiguran je kroz poglavlje - Nadzor **nad** provođenjem zakona, koje vrši Federalno ministarstvo unutrašnjih poslova, Federalno ministarstvo finansija i Policijski odbor, koji rješava u drugostepenom postupku na rješenja direktora Federalne uprave policije i drugih organa koji su nadležni za donošenje odluka po predmetnom zakonu.

VI - OPIS KONSULTACIJA VOĐENIH U PROCESU IZRADE PROPISA

U toku izrade predmetnog zakona, konsultacije su neposredno vršene sa kantonalnim ministarstvima unutrašnjih poslova i drugim zainteresovanim subjektima.

Nosilac aktivnosti u vezi s postupkom konsultacija i razmatranja primjedbi i sugestija **iznesenih** u toku konsultacija je Federalna uprava policije, koja vrši praktičnu primjenu Zakona o plaćama i naknadama policijskih službenika Federacije Bosne i Hercegovine.

Na Nacrt zakona o izmjenama i dopunama Zakona o plaćama naknadama policijskih službenika Federacije BiH svoje aktivno učešće imao je Sindikat službenika Federalnog ministarstva unutrašnjih poslova - Federalnog ministarstva unutarnjih poslova, koji je dao određene primjedbe i sugestije.

Kantonalna ministarstva unutrašnjih poslova na tekst Nacrta zakona o izmjenama i dopunama Zakona o plaćama i naknadama policijskih službenika Federacije Bosne i Hercegovine nisu imala primjedbi i sugestija.

Značajne primjedbe i sugestije je imao Sindikat službenika FMUP-a te je određen broj tih primjedbi prihvaćen, a dio primjedbi koji nije prihvaćen je iz sljedećih razloga:

Prijedlog koji se odnosi na član 2. Nacrta **zakona** da se definiše poseban stav te da se planiraju sredstva za naknade za prekovremeni rad, pored sredstava za naknade koje se isplaćuju (dnevnice, noćni rad i dr.) nije prihvaćen, jer je ovim članom utvrđena isplata brutoplaća i svih naknada korisnicima prava koje tretira ovaj zakon.

U članu 3. Nacrta **zakona** brisana je tačka 1) člana 4. Zakona, jer se pri određivanju iznosa plaće i naknada za policijske službenike ne može poštovati načelo da je ista plaća za isti čin policijskog službenika, jer **sastavni** dio plaće čini i dodatak na plaću iz člana 10. Zakona, koji zavisi od rizika, odgovornosti, složenosti ili posebnih radnih uvjeta na određenim radnim mjestima.

Prijedlog Sindikata **službenika Federalnog ministarstva unutrašnjih poslova** da se u članu 4. Nacrta **zakona** definiše da umjesto 0,5% za svaku započetu godinu penzijskog staža policijskog službenika stoji 0,7% nije prihvaćen, jer bi to zahtijevalo dodatna finansijska sredstva za plaće, a već je regulisano kao u postojećem Zakonu, tj. prihvaćeno je uvećanje za 0,5% za svaku punu godinu radnog staža policijskog službenika, a najviše 20%.

Prijedlog za izmjenu člana 9. Zakona o plaćama i naknadama policijskih službenika Federacije Bosne i Hercegovine ne može se prihvatiti, jer policijskim službenicima, prema tom zakonu, pored posebnog dodatka na plaću za posebne radne uvjete u posebnim okolnostima, federalni ministar može, na prijedlog direktora Uprave policije, utvrditi i veći trajni dodatak za pojedina radna mjesta, što nije predviđeno za službenike Sudske policije FBiH, prema Zakonu o plaćama i naknadama u organima vlasti Federacije BiH.

Prijedlog člana 10. nije prihvaćen jer isplata naknade za topli obrok i prijevoz u slučaju prekovremenog i vanrednog rada dužeg od četiri sata dnevno, odnosno osam sati sedmično, isplaćuje se samo za prisustvo u toku redovnog rada, kako je definisano i Zakonom o plaćama u organima vlasti Federacije BiH.

Prijedlog da se u članu 11. Nacrta **zakona** visina naknade za odvojeni život od porodice i naknadu troškova smještaja u mjestu rada za policijske

službenike reguliše na način kako je to regulisano u članu 27a. za direktora Uprave policije i njegovog zamjenika nije prihvaćen, jer se radi o policijskim službenicima koje imenuje Vlada Federacije BiH na mandatni period od četiri godine. Na isti način Vlada je donijela Uredbu za članove Vlade i druga lica koja imenuje Vlada, kojom je regulisala naknadu za odvojeni život od porodice.

U članu 13. (član 19. postojećeg zakona) nije objektivna niti realna predložena dodjela jednokratne finansijske pomoći u visini od 24 posljednje netoplaće koje je policijski službenik ostvario, porodici policijskog službenika koji izgubi život u obavljanju službe ili zadataka, a imajući u vidu Zaključak Vlade **Federacije BiH**, V. broj 505/2017 od 6. 4. 2017. godine, kojim je naloženo da se vodi računa o restriktivnoj budžetskoj politici Vlade Federacije BiH i Dokumentu politike o ograničavanju javne potrošnje na plaće i naknade troškova zaposlenih koji je Vlada usvojila na 59. sjedinici Zaključkom Vlade, broj 1363/2016 od 24. 6. 2016. godine.

Također, Sindikat **službenika Federalnog ministarstva unutrašnjih poslova** pogrešno tumači ovu odredbu, jer se tim članom ne pravi razlika između zaposlenog ili nezaposlenog bračnog druga ili drugog člana porodice, nego je bitno da li je policijski službenik izdržavao porodicu.

U članu 14. (član 19a) nije prihvaćen prijedlog Sindikata **službenika Federalnog ministarstva unutrašnjih poslova** da se odrede različiti iznosi naknade za prirodnu smrt policijskog službenika i za smrt člana uže porodice, jer se radi o jednokratnoj novčanoj pomoći koja se dodjeljuje porodici ili policijskom službeniku za troškove sahrane.

Prijedlog Sindikata **službenika Federalnog ministarstva unutrašnjih poslova** da se ovim zakonom definiše dodjela jubilarne nagrade za policijske službenike također je neprihvatljiv, jer se to pitanje može regulisati Kolektivnim ugovorom.

Sve primjedbe i sugestije koje je iznio Sindikat službenika FMUP-a u aktu broj: SS-64 /17 od 3. 4. 2017. godine je razmotrila Federalna uprava policije te izjašnjenje o podnesenim primjedbama i sugestijama je sačinila Federalna uprava policije.

VII - FINANSIJSKA SREDSTVA

Za realizaciju ovog zakona nije potrebno osigurati dodatna sredstva u budžetu Federacije BiH.

**PREČIŠĆENI TEKST ODREDBI
ZAKON O PLAĆAMA I NAKNADAMA POLICIJSKIH SLUŽBENIKA
FEDERACIJE BOSNE I HERCEGOVINE**

Član 2.

Pojmovi korišteni u ovom zakonu imaju sljedeće značenje:

1) "*policijski službenik*", u smislu ovog zakona, smatra se policijski službenik organa unutrašnjih poslova Federacije Bosne i Hercegovine (u daljnjem tekstu: organ unutrašnjih poslova);

2) "*radno mjesto*" je pozicija utvrđena aktom o unutrašnjoj organizaciji Federalnog ministarstva unutrašnjih poslova (u daljnjem tekstu: Pravilnik o unutrašnjoj organizaciji), na koje se raspoređuje policijski službenik;

3) "*osnovica za obračun plaće*" predstavlja novčani iznos u konvertibilnim markama (u daljnjem tekstu: KM) koji se koristi za određivanje osnovne plaće;

4) "*platni razred*" predstavlja razvrstavanje radnih mjesta utvrđenih u Pravilniku o unutrašnjoj organizaciji, određene pozicije radi određivanja iznosa osnovne plaće policijskog službenika;

5) "*koeficijent*" predstavlja brojčanu vrijednost koja se iskazuje arapskim brojevima za svaku poziciju radnog mjesta koje su razvrstane u platne razrede organa unutrašnjih poslova za utvrđivanje visine osnovne plaće;

6) "*noćni rad*", u smislu ovog zakona, rad je između 22 sata uvečer i 6 sati ujutro;

7) "*prekovremeni rad*" je rad duži od punog radnog vremena utvrđen Zakonom o policijskim službenicima Federacije Bosne i Hercegovine ("Službene novine Federacije BiH", br. 27/05, 70/08 i broj 44/11 - u daljnjem tekstu: Zakon o policijskim službenicima).

8) "**smrt policijskog službenika**" u smislu ovog zakona smatra se prirodna smrt policijskog službenika;

9) "**gubitak života**" u smislu ovog zakona smatra se kada policijski službenik izgubi život u obavljanju ili povodom obavljanja službe ili zadatka.“.

Član 3.

Finansijska sredstva za plaće, naknade i druga primanja policijskih službenika osiguravaju se u budžetu Federacije Bosne i Hercegovine (u daljnjem tekstu: budžet Federacije).

Vlada Federacije Bosne i Hercegovine (u daljem tekstu: Vlada Federacije) će radi nesmetanog funkcionisanja organa vlasti Federacije Bosne i Hercegovine (u daljnjem tekstu: Federacija) vršiti utvrđivanje i isplatu brutoplaća i naknada korisnicima prava koje tretira ovaj zakon, na osnovu utvrđene osnovice, samo do visine planiranih sredstava u budžetu Federacije za te namjene.

Član 4.

Pri određivanju iznosa plaće i naknada za policijske službenike poštivat će se načelo transparentnosti, što treba da osigura objavljivanje javnog konkursa ili oglasa za popunu slobodnih radnih mjesta policijskog službenika te da se obavezno objavljuje podatak o pripadajućoj osnovnoj netoplaći za oglašena radna mjesta.”.

Član 6.

Osnovna plaća se utvrđuje množenjem osnovice za plaću iz člana 8. ovog zakona i boda za obračun plaće s uvrđenim koeficijentom platnog razreda i tako utvrđeni iznos uvećava se za 0,5% za svaku punu godinu radnog staža policijskog službenika, a najviše do 20%.

Osnovna plaća ne može biti manja od 70% prosječne netoplaće isplaćene u Federaciji prema posljednjem objavljenom statističkom podatku.

U slučaju da množenjem utvrđene osnovice, boda za obračun plaće i pripadajućeg koeficijenta platnog razreda osnovna plaća iznosi manje od 70% prosječne plaće, policijskom službeniku će se isplatiti plaća u navedenom postotku.

Osnovna plaća obračunava se i iskazuje mjesečno za puno radno vrijeme, prema radnom mjestu i odgovarajućem platnom razredu.

Ukoliko policijski službenik radi sa nepunim radnim vremenom, u skladu sa posebnim zakonom ili drugim propisima, osnovna plaća odredit će se srazmjerno vremenu provedenom na radu.

Puno radno vrijeme zaposlenih je 40 sati sedmično.“

Član 7.

Sastavni dio plaće policijskog službenika čini osnovna plaća iz člana 6. stav 1. ovog zakona, dodatak na plaću iz člana 10. ovog zakona i naknada za prekovremeni rad, rad u neradne dane, noćni rad i rad u dane državnih praznika iz člana 16. ovog zakona.

Član 8.

Osnovica za obračun plaće se utvrđuje zakonom o izvršavanju budžeta za svaku budžetsku godinu ili odlukom o privremenom finansiranju i primjenjuje se od 1. 1. za svaku narednu godinu.

Pored osnovice za obračun plaća, prilikom obračuna plaće će se koristiti i bod za obračun plaće koji se utvrđuje zakonom o izvršavanju budžeta za svaku budžetsku godinu ili odlukom o privremenom finansiranju i primjenjuje se od 1. 1. za svaku narednu godinu.

Utvrđivanje osnovice i boda vrši se u pregovorima sa reprezentativnim sindikatom, a prije usvajanja zakona, odnosno odluke iz stava 1. ovog člana. Ukoliko se ne postigne dogovor, Vlada Federacije će utvrditi osnovicu i bod, pri čemu visina osnovice ne može biti niža od prethodno dogovorene, odnosno važeće.

Prilikom utvrđivanja osnovice i boda za obračun plaće iz st. 1. i 2. ovog člana uzet će se u obzir projekcije budžeta za narednu godinu, kao i kretanja GDP i indeksa potrošačkih cijena, a prema podacima Federalnog zavoda za statistiku.

Isplate mjesečnih novčanih primanja izvršene u skladu s odredbama ovog zakona su definitivne i konačne.

Član 10.

Polijski službenik ima pravo na poseban dodatak na plaću u iznosu do 30 % od osnovne plaće policijskog službenika bez dijela plaće po osnovu radnog staža.

Polijski službenik raspoređen na poslove i zadatke u Specijalnoj policijskoj jedinici ima pravo na poseban dodatak na plaću u iznosu do 50 % od osnovne plaće policijskog službenika, bez dijela plaće po osnovu radnog staža.

Dodatak iz stava 1. ovog člana utvrđuje zavisno od rizika, odgovornosti, složenosti ili posebnih radnih uvjeta na određenim radnim mjestima direktor Federalne uprave policije (u daljnjem tekstu: direktor policije).

Za radna mjesta policijskih službenika Federalnog ministarstva, za dodatak iz stava 1. ovog člana odlučuje federalni ministar unutrašnjih poslova (u daljnjem tekstu: federalni ministar).

Uz dodatak iz stava 1. ovog člana u posebnim okolnostima, federalni ministar može na prijedlog direktora policije utvrditi veći trajni dodatak za pojedina radna mjesta u iznosu 10 % od osnovne plaće policijskog službenika.

Član 11.

Na osnovu izuzetnih i objektivno ocijenjenih radnih rezultata policijskog službenika, direktor policije može odlučiti o jednokratnom dodatku na plaću tom službeniku do 30 % od osnovne plaće, a za policijskog službenika Federalnog ministarstva odlučuje federalni ministar.

Dodatak iz stava 1. ovog člana može se isplatiti policijskom službeniku dva puta u toku jedne kalendarske godine.

Član 12.

Plaća policijskog službenika se isplaćuje za prethodni mjesec nakon obavljenog rada, u razdobljima isplate koja ne mogu biti dulja od 30 dana.

Plaća iz stava 1. ovog člana utvrđuje se rješenjem koje donosi direktor policije, odnosno federalni ministar.

Rješenje iz stava 2. ovog člana sadrži lične podatke policijskog službenika, čin, radno mjesto na koje je raspoređen, platni razred i sve elemente koji su uzeti u obzir za utvrđivanje visine plaće.

Podaci o plaćama policijskih službenika su javni.

Član 16.

U slučaju prekovremenog rada, rada u neradne dane, noćnog rada i rada u dane državnih praznika, policijski službenik ima pravo na naknadu plaće srazmjerno vremenu trajanja tog rada uvećanu za postotak utvrđen Zakonom o policijskim službenicima ili Kolektivnim ugovorom za zaposlene u Federalnom ministarstvu (u daljnjem tekstu: Kolektivni ugovor).

“Obračun naknade iz stava 1. ovog člana vrši se od osnovne plaće iz člana 6. ovog zakona uvećane za dodatak na plaću iz člana 10. ovog zakona bez dijela plaće po osnovu radnog staža.“

U prekovremeni rad ne ulazi noćni rad.

Član 17.

Policijski službenik koji je prema članu 64. Zakona o policijskim službenicima premješten na drugo radno mjesto koje je 60 km ili više udaljeno od njegovog trenutnog radnog mjesta ima pravo uz plaću i naknadu za odvojeni život od porodice i naknadu troškova smještaja u mjestu rada u iznosu i na način koji Vlada Federacije utvrdi za državne službenike i namještenike.

Pravo na naknadu iz stava 1. ovog člana ne ostvaruje policijski službenik koji je premješten po ličnom zahtjevu, kao i policijski službenik koji je prvi put raspoređen na radno mjesto.

Član 18.

U slučaju otpusta zbog viška policijskih službenika u skladu sa zakonom, otpušteni policijski službenik koji ima do 15 godina penzijskog staža ima pravo na otpremninu koja odgovara iznosu plaće koju je primio u vrijeme kada je proglašen viškom, obračunate za period od pet mjeseci.

Otpremnina iz stava 1. ovog člana iznosi 10 mjesečnih plaća za policijske službenike koji imaju preko 15 godina penzijskog staža kao policijski službenici.

Pravo na otpremninu ne pripada policijskom službeniku koji je proglašen viškom na osnovu konačne odluke nadležnog organa o utvrđivanju postojanja sigurnosne smetnje za pristup tajnim podacima određenog stepena tajnosti u skladu sa Zakonom o zaštiti tajnih podataka („Službeni glasnik BiH, br. 54/05 i 12/09).

Član 19.

Policijski službenik koji u obavljanju ili povodom obavljanja službe ili zadatka izgubi život, sahranit će se o trošku Uprave policije, odnosno Federalnog ministarstva u mjestu koje odredi njegova porodica.

Porodici koju je policijski službenik iz stava 1. ovog člana izdržavao pripada jednokratna finansijska pomoć u iznosu posljednje netoplaće koju je policijski službenik ostvario, uvećane šest puta.“

Član 19a.

U slučaju prirodne smrti policijskog službenika na radnom mjestu i van radnog mjesta i smrti člana uže porodice, porodici ili policijskom službeniku će se isplatiti jednokratna novčana pomoć u iznosu četiri prosječne netoplaće isplaćene u Federaciji, prema posljednjem objavljenom statističkom podatku.

Ukoliko u Upravi policije, odnosno Federalnom ministarstvu rade dva ili više članova porodice, troškovi sahrane iz stava 1. ovog člana isplaćuju se samo jednom zaposlenom članu porodice.

Član 23.

Policijski službenik ima pravo na naknadu za obrok (bonovi za ručak) za vrijeme rada samo za dane prisustva na poslu.

Policijski službenici Federalnog ministarstva ostvaruju pravo iz stava 1. ovog člana u obliku naknade za ishranu za vrijeme rada (topli obrok) u iznosu od 1 % prosječne plaće u Federaciji prema posljednjem objavljenom statističkom podatku.

Policijski službenici raspoređeni u Specijalnoj policijskoj jedinici, pored prava iz stava 2. ovog člana, ostvaruju pravo na obrok u restoranu Specijalne policijske jedinice.

Pravo na naknadu iz st. 1., 2. i 3. ovog člana ne ostvaruje se u slučaju odsustvovanja sa posla po bilo kom opravdanom ili neopravdanom osnovu (službeni put, plaćeno odsustvo, odsustvo zbog bolesti i slično).

Član 27a.

Pravo na smještaj i odvojeni život od porodice direktor policije i njegov zamjenik čije je mjesto prebivališta udaljeno više od 70 km od mjesta rada ostvaruju u skladu sa odredbom člana 27. ovog zakona.

Član 29.

Naknade i druga materijalna prava predviđena u odredbama čl.: 15., 16., 17., 18., 19., 22., 25. i 27. ovog zakona ostvaruju se donošenjem rješenja.

Rješenje iz stava 1. ovog člana donosi direktor policije, odnosno federalni ministar.

“Rješenje iz stava 1. ovog člana, koje se odnosi na direktora policije i njegovog zamjenika, donosi federalni ministar.

Na rješenje koje donosi direktor policije, odnosno federalni ministar na osnovu ovog zakona policijski službenik može izjaviti žalbu Policijskom odboru u roku od 15 dana od dana prijema rješenja.“

